

Htawm tem' ri tuil' ri muk kon' Hkrit Hpi'li'pi'

¹ Htawm ti ok' aen' na ko', meuh a ku' Paw'lu maeé' Ti'mo'se meuh ya mhai' Eun Yesu' Hkrit,

ya tem' ri tuil' a ri peue veng Hpi'li'pi' ku' meuh peue Eun Peucawo' hk'a'naee Yesu' Hkrit Eun na' pe' gawm'euc', ri ro'kan maeé' nang nom'nawk muk kon' Hkrit na' ce.

² Kah mun' sin' maeé' hk'a' kuit nyawk' kuit sam'ran cumyen' lih neum Kuing' Peucawo' e' na' Eun maeé' neum Cawo' Yesu' Hkrit Eun na' kue' ri pe' reu'.

Hk'o' mun' pun muk kon' Hkrit Hpi'li'pi'

³ Mun' keuting ui' ri Peucawo' Eun yam kuit rot ui' ri pe' ku pok na'. ⁴ Yam hk'o' ui' mun' pun pe' gawm'euc' ku pok na', ui' hk'o' a maeé' hk'a' ren'kawn ri laleung, ⁵ kopti pe' ku pun ri pawng' ri maeé' ui' hk'a'naee vang sangsawn' leukah' mun' ren'kawn na' tang' neum seunyi yamla a ri na' rot maet'maen' na'. ⁶ Peucawo' la ri yeuh kan' chak' hk'a'naee pe' na' kaw Eun suip ri yeuh kan' aen' a htonnuk rot ti seunyi yam Yesu' Hkrit tang lih Eun na' rot ka na', ui' yum' a neum.

⁷ Yum' ui' pe' gawm'euc' yeuhki' na' cawp' ka, kopti ut' pe' hk'a'naee hpum' ui' na'. Kopti yam buih pun ui' ri hkam' hk'a' hk'awng' ri na', a'ko' yam leukah' htu'hting' htawhkam ui' leukah' mun' ren'kawn na', pe' ku pun ri pawng' ri maeé' ui' hk'a'naee kan' ku' Peucawo' tuil' Eun a ri ui' ri mun' Eun na'. ⁸ Ui' ci' pe' keutui' hpum' pe' gawm'euc' ri a'neng na', Peucawo' pen' hkam' Eun

sa'hki' ka pun ui'. Leumeus' ui' pe' gawm'euc' ri hk'a' leumeus'keus Eun Yesu' Hkrit na'.

⁹ Hk'o' ui' mun' kah hk'a' leumeus'keus pe' na' gawm baet ri heun' vah keuting hk'a'naee peuyha' cu'yi mae' hk'a' leuceng pun ku' neumneum na', ¹⁰ punta kaw pe' cang gvah ku' chak' hk'ai' peue na' a ci' meuh keunhaw' na', mae' punta kaw pe' pun ri seunga' chak' un' laee kue' vang ri rot ti yam seunyi Eun Hkrit na' rot ka na', ¹¹ mae' punta kaw pe' kue' pli' ka hk'a' leupaws seumeu' lih neum Yesu' Hkrit Eun na' htonnuk na'. Aen' a meuh punta kaw tuil' hk'a' munhpung' mae' hk'a' suk'seun' Peucawo' Eun na'.

Hk'a' hk'awng' Paw'lu pun Eun ri hkam' na' yeuh a leukah' mun' ren'kawn na' puin' ri heul'

¹² Ec'awng' na' pe', maet'maen' ku' sum' kah ui' pe' yawng na', neumneum ka na' ko', ku' meuh ri ui' na' hawe a lak' meuh ku' yeuh leukah' mun' ren'kawn na' puin' ri heul'. ¹³ Tang' neum peue suik' roksa' nya haw' eun hkun'haw'hkam' na' ce rot ti peue seubu gawm'euc' na' ce ku pun ri nyu a glih'gleueng' pun ui' ri hkam' ri hk'awng' ri na' htawng' na' meuh a pun Hkrit Eun. ¹⁴ Kopti meuh a hk'a' hk'awng' pun ui' ri hkam' na', yeuh a ec'awng' hk'a'naee Peucawo' Eun na' ce hk'a' heun' na' ce gawm pun kaw'reng ri hpum' hat'han' un' lhat' ri ris leukah' Eun Peucawo' na'.

¹⁵ Meuh a neum, peue ngon' na' pa'o' ce lawng Eun Hkrit na' mae' hko'e'mang' ri mae' sum' keutec' hkeng puri na'. Daecti ku' seubu na' ce ngon', ce pa'o' a mae' keutui' hpum' ri ku' chak' na'. ¹⁶ Peue awn' ce yeuh a mae' hk'a' leumeus'keus ri yawng ce Peucawo' mhe' Eun ri uin' peue kaw mheut' ui' kopti kawn' ui' leukah' mun' ren'kawn na'. ¹⁷ Daecti muk nanggal' na' ce pa'o' lawng Eun Hkrit na' mae' hk'a' sum' lhung' sum' keuting ri pun tu' ri na'.

Ce un' yeuh a mae' meuh a ku' lih neum hpum' ri na', daecti ce yeuh a mae' keutui' hpum' ce kaw ri yeuh ui' tukhka yam buih pun ui' ri hkam' hk'a' hk'awng' ri na'.
¹⁸Daecti a ci' kaw yeuh keunhaw'? Ce saec' na' paot' a mae' hk'a' tang' hpum' un' cawp' ri na', a'ko' cawp' ri na', daecti vang a'ye' keuting ka na' pun ce ri paot' lawng Eun Hkrit na'. Kopti meuh a ceu nang aen' a, ui' ren'kawn. Ui' ku kawn' kaw ren'kawn hk'a' nanggal' ka na' heul',
¹⁹kopti yawng ui' meuh a kopti leukah' hk'o' mun' pe' na' mae' meuh a kopti hk'a' teum'kawm ka Cit' seungat' Eun Yesu' Hkrit na', ku' pun ri meuh ri ui' na' a kaw pon ui' heul'.
²⁰Yum' ui' mae' keutui' hpum' ui' ri kaw un' laee yeuh ku' hk'o'kaic na' saec' ti ceu, daecti kaw ui' kue' hk'a' hat'han' na' htonnuk punta maet' maen' Hkrit kaw Eun pun ri rap ri ti munhpung' na' kopti meuh a jawngkui' tu' ui' na' seun' ku' tawn pun Eun laleung na', ui' saec' na' a'yu im', a'ko' caw ri yeum un' lah'.
²¹Kopti pun ui' na' ko', pun ui' ri a'yu im' na' meuh a pun Eun Hkrit, caw ri pun ri yeum na' ko', a jaen na' chak' nyawk'.
²²Ui' lawn na' kawn' suip ri a'yu im' hk'a'naee jawngkui' tu' ri aen' na ko', ui' na' yeuh kan' kaw kue' pli' na'. Daecti ui' un' yawng kaw ri leuk ri ti hk'a' nangnhaw' na' a na' chak' nyawk' ri ka.
²³Ui' kawn' kangkae hk'a'naee hpum' ri kopti hk'a' lal' hk'a' aen' na. Hpum' ui' na' ti hk'a' ka na' sum' ing' ut' ui' mae' Hkrit Eun, a jaen na' chak'.
²⁴Daecti ui' saec' na' kawn' pun ri a'yu im' na', a jaen kue' mun' pun pe'.
²⁵Yam yawng ui' aen' a meulamlam ri na', ui' yawng kaw ri tang suip ri a'yu im' ut' mae' pe' heul', punta kaw pe' huk'hawn' mae' ren'kawn hk'a'naee hk'a' yum' na'.
²⁶Yam na' ui' pun ri tang ing' glue ri pe' na' ko', pe' kaw ren'kawn htonnuk hk'a'naee Yesu' Hkrit Eun kopti meuh a ui' ri na'.

²⁷A saec' na' yeuh sa'nhaw' ko', yeuh ri kuing'hpaw mae' leukah' mun' ren'kawn Eun Hkrit na' reu'. Hawc' ko',

ui' saec' na' ing' ri pe', a'ko' pun ri mhawng' yawo lawng pe' na' un' lah', ui' kaw yawng cawng keutawn' meuh pe' hpum' ti meul', seun' peue ti peue pe' tuik' peueng' punta hk'a' yum' ka leukah' mun' ren'kawn na'. ²⁸ Un' lhat' ri peue to'tam' pe' na' ce na', kaw a meuh het' pun ce ri nyu kaw ce pun ri lulaic, daecti pe' kaw pun ri lawtpon ri Peucawo' Eun. ²⁹ Kopti Peucawo' tuil' Eun pe' kaw yum' Hkrit Eun palkoe na' a hkuin' meuh, daecti Eun ku kah pe' pun ri hkam' ku' tukhka na' pun Heun yeut. ³⁰ Kopti saec' pe' ri, buih pun pe' ri hpa' ku' ham'tap na' seun' ku' tawn nyu pe' hk'eup' ui' a na'. Saec' meuh maet'maen', pe' ku pun ri mhawng' kawn' buih ham'tap ui' a yeut.

2

Tang' hpum' ri onawn' seun' Hkrit Eun

¹ Pe' lawn pun kaw'l'reng ri ri meuh pe' ti jawngkui' tu' mae' Hkrit Eun, pe' na' pun ri rap ri ti hk'a' seueul' hpum' ri neum hk'a' leumeus'keus Eun na', pun ri yeuh a'mawo mae' Cit' seunga' na' mae' pun ri rap ri ti hk'a' onawn' mae' hk'a' tukyak na' ko', ² kah pe' yeuh ui' ren'kawn htonnuk ri kue' pe' kamkuit ti hk'a', hk'a' leumeus'keus keuhti, hpum' ti meul' mae' vang keutui' hpum' keuhti na' reu'. ³ Pawlaee yeuh ri sum' lhung' sum' keuting, pawlaee kuit yawo pun tu' ri na' palkoe, daecti yeuh a hk'a'naee hpum' onawn' ri, sawn' peue ri chak' hk'ai' tu' pe' na' reu'. ⁴ Pe' ri ti peue hawc' ti peue, htuk' pe' ri un' sok pal ku' kaw kue' mun' pun pe' na', daecti pe' ku na' htuk' ri kuit ku' kaw kue' mun' pun peue na' reu'.

⁵ Htuk' pe' ri kue' hk'a' tang' hpum' seun' Yesu' Hkrit Eun.

⁶ Eun saec' na' meuh seun' Peucawo' Eun,
daecti Eun hkuin' jhawp' seun' htan Eun Peucawo'
na'.

- 7 Daecti Eun hpuic' ri uin' an'nya ri na',
Eun lih hkam' ri meuh seun' mhai',
lih keut' ri meuh peue.
- 8 Yam lih meuh Eun peue na',
Eun yeuh hpum' ri tem.
Eun saec' na' yeum pang kleum' rawng'tawp' na',
Eun yawm' ri leuceng ri ti leukah' Eun Peucawo'
na'.
- 9 Kop awn' na, Peucawo' Eun yuk Eun huk' lhung' ri vang
munhpung' lhung' hk'ai' peue na'.
Eun tuil' muis hk'a' pang ka muis seubu gawm'euc' na'
ri Heun,
- 10 punta ku' a'yu im' nang kuing' pang maos', pang bhen'
keute' na' mae' hk'a' ruim ka bhen' keute' na'
kaw ce seukluin ri mae' muis Eun Yesu' na',
- 11 mae' punta dak' ku dak' na' kaw a rap ri ti Yesu' Hkrit
meuh Eun Peucawo' na'
punta kaw ce tuil' munhpung' ri A'kuiing' Peucawo'
Eun na'.

Ceng' seun' seumeueng'

- 12 Kop awn' na a'mawo leumeus' ui' na' pe', seun'
leuceng pe' ri ti leukah' ui' na' ing' laleung na', a hkuin'
caee meuh yam ut' ui' mae' pe' na' palkoe, daecti pe' na'
htuk' ri jaen gawm leuceng a heun' hk'ai' yam un' laee ut'
ui' mae' pe' na', kah pe' suip ri yeuh a heul' hk'a' naee hk'a'
lhat' ruing na' rot ti pun pe' hk'a' htut lawtpon na' reu'.
- 13 Kopti Peucawo' meuh Eun Cawo' yeuh kan' hk'a' naee pe'
na'. Eun kah pe' kue' hpum' sum' yeuh a hot' hk'a' keutui'
hpum' chak' Eun na'.

14-15 Punta kaw pe' un' laee kue' vang ri na' mae' kaw
pe' kue' hk'a' seunga' chak' na' seun' meuh pe' kon' hk'i
Eun Peucawo' un' laee kue' vang ri hk'a' naee peue chi' lai
ri hk'a' na' ce na', kah pe' yeuh ku ceu na' hk'a' naee vang
un' vuinvaw pe', a'ko' un' htu'hting' puri na' reu'. Htuk'

pe' ri til' ku' ceng' na' nang ngon' ce peue map' na' seun' seumeueng' na' til' a pang mao' na' ko'. ¹⁶ Punta hteo' ui' ri na' mae' yeuh ui' kan' na' un' meuh a ku' hk'o' hk'awng' na' mae' punta kaw ui' cang yeuh a meuh seure' ri pun hk'a'nae seunyi yam Hkrit tang lih Eun na', tuil' leukah' a'yu im' na' ri peue map' na' ce reu'. ¹⁷ Daecti ui' saec' na' pun ri buit ri hk'uic' seun' leuum' ku' tan na' hk'a' pang ku' tan na' mae' hk'a' pang kan' mhai' yeuh pe' hk'a'nae hk'a' yum' pe' na' ko', ui' ren'kawn mae' ren'kawn mae' pe' gawm'euc' tiduih'. ¹⁸ Kop awn' na, pe' ku na' htuk' ri ren'kawn mae' ren'kawn mae' ui' tiduih' yeut.

Ti'mo'se eun mae' E'pahpawdita's eun

¹⁹ Punta hpum' ui' na' kaw a sam'ran yam pun ui' ri mhawng' lawng pe' na', ui' keutui' hpum' a hk'a'nae Cawo' Yesu' Eun, un' ling', ui' kaw cus' Ti'mo'se eun heul' ri pe'. ²⁰ Ui' hkuin' kue' nang seubu cang kuit ri mhawng' ku' nyhap' ku' sam'ran pe' na' seun' Ti'mo'se eun saec' ti peue. ²¹ Kopti peue na' sawng'sawng' sok ce mun' pun tu' ri na', ce un' kuit pun Yesu' Hkrit Eun. ²² Daecti Ti'mo'se eun ci' pe meuh peue ritroe chak' a'neng na', pe' ku yawng a. Eun yeuh mhai' mae' ui' hk'a'nae vang pao' leukah' mun' ren'kawn na' seun' kon' na' yeuh eun mhai' eun kuiing' ri na'. ²³ Kop awn' na, yam yawng ui' lawng ku' to' ri ri ui' na' kaw a hawc' yeuh sa'nhaw' na', ui' keutui' hpum' kuit ri kaw keulawn' cus' eun heul' ri pe'. ²⁴ Yawng ui' a meulamlam ri hk'a'nae Cawo' Peucawo' Eun na', un' ling', kaw ui' ing' ri pe' tam' tu' ri na'.

²⁵ Daecti kuit ui' ri kaw htuk' ri cus' E'pahpawdita's eun keutah ing' ri pe'. Eun meuh ec'awng' ui', meuh a'mawo yeuh kan' tiduih' mae' ui' mae' meuh peue suik' tiduih' mae' ui'. Eun ku meuh peue cus' pe' eun heul' teum'kawm ku' lo' ui' na'. ²⁶ Eun leunyeng nyawk' ri pe', eun hpum' un'

sam'ran, kopti pun pe' ri mhawng' lawng peuyhat eun na'.
²⁷ Neumneum ka na' ko', peuyhat eun kaw hk'aws' yeum,
 daecti Peucawo' Eun tukyak ri heun. A hkuin' meuh heun
 ri koe, daecti punta kaw ui' un' laee kuit nyhap' hk'a' pang
 ka hk'a' kuit nyhap' na', Eun ku tukyak ri ui' yeut. ²⁸ Kop
 awn' na, punta kaw pe' ren'kawn mae' tang pun pe' ri nyu
 eun bae' na', mae' punta hk'a' kuit nyhap' ui' na' kaw a
 yawm' na', ui' cus' eun ing' ri pe' vaevae. ²⁹ Kah pe' rap ri
 ti eun hk'a'nae Peucawo' Eun ri hk'a' ren'kawn nyawk' na'
 mae' tuil' munhpung' ri peue yeuhki' na' ce reu', ³⁰ kopti
 dae' yeum eun pun kan' Eun Hkrit na'. Eun ti im' yeum ri
 teum'kawm ui' hk'a'nae ku' yeuh un' pun pe' na'.

3

Pawlae papuing hk'a' nham' keune na'

¹ Ec'awng' na' pe', leukah' tisu' ka na', ren'kawn
 hk'a'nae Peucawo' Eun reu'. Gawm tem' ui' lawng ka ku'
 tawn tem' ui' ri pe' na' bae' na', a hkuin' meuh ku' nyhap'
 pun ui'. A ku kaw meuh ku' kang'ru kum pe' meun.

² Uin' sati ri ri muk so' teh' ce, peue yeuh kan' rai na' ce
 mae' ri peue pes' ri tec keune ri na' ce reu'. ³ Kopti meuh
 e' peue ton' duing' hak' neumneum na'. E' fae' Peucawo'
 Eun ri Cit' seunga' Eun na'. E' ti seure' ri hk'a'nae Yesu'
 Hkrit Eun. E' un' papuing hk'a' nham' keune na', ⁴ ui' saec'
 na' kaw kue' vang keutui' hpum' cang papuing a.

A'nhaw' lawn kuit ri kue' vang keutui' hpum' kaw ri
 papuing ri hk'a' nham' keune na' ko', ui' jaen kue' a heun'
 hk'ai' heun. ⁵ Hawc' keut' ui' a pun seudi' seunyi na',
 ui' rap ri ti hk'a' ton' duing' hak' ri na'. Ui' meuh peue
 I'sarela' ceucat eun Benjamin*. Ui' meuh taengtaeng

* **3:5** 3:5 Hkun'haw'hkam' nanggal' ce peue I'sarela' na' ing' eun neum ceucat
 eun Benjamin na'.

peue Hebrae'. Hk'a'naee hk'a' leukah' ritroe na' ko', ui' meuh peue Hparisae'. ⁶Hk'a'naee hk'a' reng ri hk'a' hpasa na' ko', ui' tawn keunhap' muk kon' Hkrit na' ce. Hk'a'naee hk'a' leupaws seumeu' na' hot' leukah' ritroe na' ko', ui' hkuin' laee kue' vang ri.

⁷ Daecti a sum' meuh keunhaw' na' ku' tawn meuh ku' a'ye' keuting ri ui' na', maet' maen' kopti meuh a Hkrit Eun na', ui' sawn' a meuh ku' sum. ⁸ Lheu' awn' na, ku ceu na' yam keutec a ri mae' ku' keuting pun ui' ri yawng Yesu' Hkrit Cawo' ui' na' Eun na', ui' nyu ku ceu na' meuh ku' un' kue' ngos. Ui' tecla ku ceu gawm'euc' na' ce pun Heun. Punta kaw ui' pun Hkrit Eun na' mae' ut' hk'a'naee Heun na', ceu nang awn' ce ui' sawn' a meuh hpam'. ⁹ Tu' ui' na' meun ko', ui' hkuin' kue' hk'a' leupaws seumeu' pun ri neum leukah' ritroe na', ui' kue' yawo pal hk'a' leupaws seumeu' pun ri neum hk'a' yum' ui' Hkrit Eun na'. A meuh hk'a' leupaws seumeu' lih neum Peucawo' Eun, pun a ri neum hk'a' yum' na'. ¹⁰ Sum' yawng ui' Hkrit Eun na' mae' sum' cheu ti'ca kuh' im' Eun na'. Ui' sum' seun' Heun ri hk'a'naee hk'a' pun ri hk'eup' hk'a' tukhka na' mae' hk'a' pun ri yeum na', ¹¹ punta ti hk'a' un' meuh ko' ti hk'a' na', ui' kaw tang kuh' im' yeut.

Tawk' cim' ri heul' vang pe na'

¹² Pun ui' aen' ce gawm'euc' hawc' na', a'ko' pun ui' ri hkam' ri mhe' ri meuh peue chak' htonnuk hawc' na', a hkuin' meuh. Daecti punta kaw ui' seubut ri ti ku' Yesu' Hkrit uin' Eun ui' kaw seun' Heun ri na', ui' tawk' cim' ri heul'. ¹³ Ec'awng' na' pe', hpaw ui' ca' sawn' meun ri seubut ri pun aen' ce hawc', daecti yeuh ui' ti ceu. Awn' a ko', pil ku' pon heul' hawc' na', hawc' ko', nguih tu' ri na' heul' ri ku' kue' hk'a' nanggal' na'. ¹⁴ Punta hk'a' kaw ui' pun ri huk' nang kuing' pang ma' na' kopti meuh a ku' Yesu'

Hkrit yeuh Eun na' kaw a meuh lapsawng' pun ui' na', ui' kaw tawk' cim' ri heul' vang pe na'.

¹⁵ Peue keuting hk'a'naee hk'a' civit ri ku peue na' e', htuk' e' ri kue' kamkuit yeuhki'. Mi lawn kuit ku' ti ri ceu na' a un' seun' aen' a ko', Peucawo' kaw Eun yeuh mi leuceng pun a ceng'sae'. ¹⁶ Kah yawo e' a'yu im' kuing'hpaw mae' hot' ku' yeuh rot e' na'.

¹⁷ Ec'awng' na' pe', pawng' puri hot' ri yeuh seun' ku' yeuh ui' na' mae' hot' ri yeuh seun' peue a'yu im' hot' ku' tuil' ye ri pe' na' ce reu'. ¹⁸ Kopti seun' ku' tawn tuil' ui' sati pe' laleung leumah' na', maet'maen' ui' ku' tuil' sati pe' mae' leuum' ngai' ri, kue' a nang a'yu im' seun' meuh ce ransu ka kleum' rawng'tawp' Eun Hkrit na' heun' peue. ¹⁹ Hk'a' tisut' ce na' kaw a meuh hk'a' lulaic. Peucawo' ce na' meuh a keuteul ce na'. Ce mhawng' ri hk'o'cuin mae' ku' htuk' ce ri kaic na'. Ce ta' hpum' ri na' ri ku' to' ri hk'a' bhen' keute' na'. ²⁰ Daecti e' ri meuh e' peue kuing' pang mao'. E' buih ko' Cawo' htut lih neum kuing' pang mao' meuh Cawo' Yesu' Hkrit na' Eun. ²¹ Hk'a'naee cu Eun ti'ca ku' cang yeuh ku' ceu gawm'euc' na' ut' hk'a'ruim ti'ca Eun na', Eun kaw plin' jawngku' tu' tem nyawk' e' na' meuh seun' jawngku' tu' kue' munhpung' keuting Eun na'.

4

¹ Kop awn' na, ec'awng' leumeus' mae' keutui' hpum' ui' ri pe' ku' meuh hk'a' ren'kawn kuit sam'ran mae' meuh cui'maw hk'il' ui' na' pe', a'mawo leumeus' ui' na' pe', htuk' pe' ri cawng keutawn' hk'a'naee Peucawo' Eun seun' awn' a.

² Hk'o'hk'ang ui' a ri Yuodia mae' Sintiche pa', kah pa' htuk'lung puri hk'a'naee Peucawo' Eun. ³ Hk'o'hk'ang ui' a ri peue ku' meuh a'mawo pun ri peus beus hk'a'naee vang kati keutawn' tiduih' mae' ui' na' pe', kah pe' teum'kawm beun' na' ka. Meuh ka peue yeuh kan' pun leukah' mun'

ren'kawn na' tiduih' mae' ui' mae' Hkremen mae' peue seubu ku' meuh a'mawo yeuh kan' mae' ui' na' ye. Peue awn' ce kue' muis hk'a'naee htawm a'yu im' na' yeut.

Tuil' sati

⁴ Ren'kawn hk'a'naee Peucawo' Eun laleung reu'. Ui' kaw tang lah' a bae ti pok, ren'kawn reu'. ⁵ Yeuh hpum' onawn' pe' na' glih'gleueng' ri peue gawm'euc' reu'. Un' ling', Cawo' Yesu' na' Eun lih rot. ⁶ Pawlaee hki'keung ri keunhaw' na' saec' ti ceu, daecti hk'o' ku ceu na' ri Peucawo' Eun ri hk'o' mun', hk'o'hk'ang mae' mun' keuting na'. ⁷ Hawc' ko', hk'a' kuit nyawk' kuit sam'ran cumyen' Eun Peucawo' ku' un' kuit rot pe' ri ka na' kaw a roksa' hpum' pe' na' mae' kamkuit pe' na' hk'a'naee Yesu' Hkrit Eun.

⁸ Ec'awng' na' pe', leukah' tisut' na', ku' meuh neum-neum, ku' kuing' ri suk'seun', ku' cawp', ku' seunga' chak', ku' hk'o'leumeus' mae' ku' hk'o'suk'seun' na' kuit ri mhawng' lawng aen' ce reu'. Ceu nang aen' ce meuh a ku' chak' kuing' ri suk'seun' na', kuit ri nawk a reu'. ⁹ Ku' pun pe' ri rin, pun pe' ri rap, pun pe' ri mhawng' mae' pun pe' ri nyu ri ui' na' ce na', ti ri yeuh a reu'. Hawc' ko', Peucawo' ka hk'a' kuit nyawk' kuit sam'ran cumyen' na' Eun kaw ut' mae' pe'.

Mun' keuting ri peue Hpi'li'pi' tuil' lapsawng' na' ce

¹⁰ Ren'kawn nyawk' ui' hk'a'naee Peucawo' Eun, kopti vang tisut' ka na' tang kuit nyhap' pe' pun ui' bae na'. Neumneum ka na' ko', kuit nyhap' pe' pun ui' laleung, daecti a un' kue' yam kaw pe' yeuh a puc tu' hkeul' ri na'. ¹¹ Lah' ui' a yeuhki' na', a hkuin' meuh kopti buih lo' ui'. Kopti a saec' na' yeuh sa'nhaw' ko', rin ui' ri ti hk'a' hit' hpum' ri ku' kue' meun ui' na' hawc'. ¹² Yam cutyawm' na' a yeuh sa'nhaw' na' ui' yawng a. Yam kue' paipeng na' a

yeuh sa'nhaw' na', ui' ku yawng a yeut. Saec' na' hk'a ri sak', a'ko' ngeup' ri, saec' na' meuneum a'ko' hk'o'tukyak, a saec' na' yeuh sa'nhaw' ko', rin ui' ri ti ku' vangdoh' mo' ka hk'a' hit' hpum' ri ku' kue' meun ui' na' hawc'. ¹³ Ui' cang yeuh ku ceu gawm'euc' na' ri Hkrit Cawo' tuil' kaw' reng ui' na' Eun.

¹⁴ Daecti yam pun ui' ri tukhka na', pe' gvah ri tuil' ui' is' na', a chak' nyawk'. ¹⁵ Lheu' awn' na, seun' peue Hpi'lipi' na' yawng pe' a hawc' na', yamla ui' ri sangsawn' leukah' mun' ren'kawn pok nanggal' yam suip ui' ri pucti neum kuing' pe' Masido'ni' na', a hkuin' kue' muk kon' Hkrit teum'kawm ui' ri ku' cai' saec' ti muk, a kue' pal pe' ri koe. ¹⁶ Saec' meuh yam kawm' ut' ui' nang veng Hte' salo'ni' na', yam lo' ui' na', pe' ku bu' ku' lo' ui' na' ti pok hawc' ti pok. ¹⁷ Lah' ui' a yeuhki' na' a hkuin' to' ri meuh sum' is' ui' lapsawng', daecti sum' kah ui' pe' pun hk'a' nap mun' na' kopti meuh a hk'a' tukyak pe' na'. ¹⁸ Pun ui' ri rap ri ti lapsawng' ku' bu' pe' ri E'pahpawdita' eun na' hawc'. Neumneum ka na' ko', ui' pun a lheu' hk'ai' ku' lo' ri na'. Ceu nang aen' ce a meuh ku' tan hom'. A meuh ku' tan Peucawo' rap Eun ri ti, a hit' ri hpum' Eun.

¹⁹ Kopti meuh a Yesu' Hkrit Eun na', Peucawo' ui' na' Eun kaw tuil' ku' lo' pe' na' ku ceu ka ri pe' ri hk'a' meuneum nyawk' Eun na'. ²⁰ Kah munhpung' na' kue' ri A'kuiing' Peucawo' e' na' Eun cot'cu ri reu'. Amin.

Leukah' tisut'

²¹ Peue Eun Peucawo' hk'a'naee Yesu' Hkrit Eun na' ce ku peue, lah' ce mhawng' keutui' hpum' ui' ce. Ec'awng' ut' mae' ui' na' ce ku tawm' a ce lah' ri leunyeng ri pe'. ²² Peue Eun Peucawo' na' ce ku peue, lheu' awn' na peue ut' nang haw' eun Kae'sa na' ce ku lah' ri leunyeng ri pe' yeut.

Hpi'li'pi' 4:23

12

Hpi'li'pi' 4:23

²³ Kah mun' Eun Cawo' Yesu' Hkrit na' kue' ri civit pe' na' reu'.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c